

Departamento di Cultura Aruba: Escritor Joe Fortin, tabata di bishita



ORANJESTAD – Departamento di Cultura Aruba (DCA) a ricibi bishita di Joe Fortin, kende a bin haci entrega di su buki di poesia “Canto di lama” cerca drs. Siegfried Dumfries, director di DCA. Durante e encuentro aki el a combersa ameno cu Sr. Dumfries tocante su estudio na Hulanda, su trabou cu e ta haci na “Vereniging van Schrijven en Vertalers” cu ta cuida e derecho di autornan.

E ta actualmente preparando pa su PHD y lo defende su tesis riba literatura di Aruba. Sr. Fortin ta haya esaki masha interesante mes. El a termina su drs. riba literatura Caribense Spaño na Leiden.. Joe ta un teorico literario. Aki dos aña lo termina su doctorado.

Jose L. “Joe” Fortin a nace na Aruba na 1967. El a studia Latin American Studies y a gradua den ramo di literatura na Universidad

di Leiden. Actualmente e ta investigando literatura di Aruba skirbi na Papiamentu pa su doctorado (PHD). Cu e buki aki Canto di lama e ta debuta riba tereno di poesia. Temanan di su poesia ta entre otro, Soledad y amistad, melene y deseo, soño y inspiracion, a base di auto reflexion, recuerdonan y elementonan di naturalesa. Na aña 2013 el a publica su buki di ficcion cu 11 storianan cortico, esta “City Store”.

Den e buki Canto di Lama bo ta haya un prelude di Freddy Montoya y e portada y diseño ta di Rense Parlevliet.

Sr. Fortin a ser gradici pa su aportacion nan cu e tabatin via Hulanda pa cu trabounan di Seccion di Implementacion. E tabatin un encuentro cortico cu Hefe di Seccion di Implementacion y a conta tocante di nos proyecto actual di Arte di Palabra cu lo tuma luga riba 5 di maart 2016 den Fort Zoutman. Tambe el a cera conoci cu Hefe di Sec-



cion di Investigacion y Documentacion, drs. Shailiny Tromp Lee.

Tabata un momento di comparti hopi informacion den un corto tempo y despues

na final a presenta su buki na drs. Dumfries, director di DCA. Kende na su turno a desea su persona tur clase di exito cu su estudio y sigui aporta na literatura Arubano di nos dushi Papiamentu. □

